

ERINDISBRÉF

fyrir eftirlitsmenn sjávarútvegsráðuneytisins.

1. gr.

Erindisbréf þetta tekur til eftirlitsmanna eða trúnaðarmanna sjávarútvegsráðuneytisins, sem ráðnir eru til þess að fylgjast með fiskveiðum í fiskveiðilandhelginni, sbr. 8. gr. laga nr. 81 31. maí 1976 um veiðar í fiskveiðilandhelgi Íslands.

2. gr.

Eftirlitsmenn hafa skyldur og njóta réttinda, sem opinberir starfsmenn. Um laun þeirra fer eftir ákvæðum kjarasamninga ríkisstarfsmanna.

Ráðuneytið ákveður vinnutilhögun eftirlitsmanna með hliðsjón af gildandi kjarasamningum.

Eftirlitsmönnum er skylt að rækja með alúð og kostgæfni skyldur þær, sem á þeim hvíla í starfi þeirra.

3. gr.

Eftirlitsmenn lúta yfirstjórn sjávarútvegsráðuneytis, en deildarstjóri eftirlitsdeildar stýrir eftirlitsdeild og er yfirboðari eftirlitsmanna. Sér hann, ásamt manni tilnefndum af Hafrannsóknastofnuninni, um daglega stjórnun eftirlitsins, að svo miklu leyti, sem hún er ekki ákveðin í erindisbréfi þessu.

4. gr.

Eftirlitsmenn skulu kynna sér rækilega lög og reglugerðir svo og aðrar reglur svo sem ákvæði leyfisbréfa, sem gilda um hvers kyns veiðar og veiðarfæri í fiskveiðilandhelginni. Þeim er skylt að haga störfum sínum í samræmi við ákvæði slíkra fyrirmæla og ákvarðanir yfirmanna eftirlitsins.

5. gr.

Skipstjórum fiskiskipa er skylt að taka eftirlitsmenn með í veiðiferð(ir) sé þess óskað.

Einnig er skipstjórum skylt að veita eftirlitsmönnum alla þá starfsaðstöðu og aðstoð, sem þeim er nauðsynleg í starfi sínu, m. a. greiðan aðgang að fjarskiptatækjum, staðsetningartækjum og kortum.

6. gr.

Eftirlitsmenn ráðuneytisins skulu fylgjast með fiskveiðum og veiðarfærum í því skyni að koma í veg fyrir skaðlegar veiðar og hafa eftirlit með því, að þeim reglum sé fylgt, sem um veiðarnar gilda.

Hvenær sem eftirlitsmenn ráðuneytisins telja, að veiðar skipa geti talist skaðlegar nytjastofnum, m. a. vegna mikils magns af smáfiski í afla, skulu þeir þegar tilkynna það Hafrannsóknastofnuninni, eða þeim manni, sem forstjóri stofnunarinnar hefur tilnefnt í þessu skyni.

Sé nauðsynlegt að banna veiðar af fyrrnefndum ástæðum, skal eftirlitsmaður gera tillögur um stærð svæðis eða svæða, sem banna þarf veiðar á.

Hvenær, sem eftirlitsmaður verður þess var að afla er kastað fyrir borð, skal hann áætla og skrá eins nákvæmlega og við verður komið magn einstakra tegunda.

7. gr.

Eftirlitsmenn skulu eftir því sem við verður komið og í samráði við Hafrannsóknastofnunina annast almenna sýnatöku á fiski, skrá kyn hans, lengd og kynþroska, o. s. frv. Einnig gera aðrar þær athuganir, sem Hafrannsóknastofnunin óskar, svo sem mælingar á ástandi sjávar.

8. gr.

Eftirlitsmenn skulu eftir nánari fyrirmælum safna upplýsingum um gæðamat, stærðarmat og aflamagn hjá mats- og vigtarmönnum ef þurfa þykir.

Einnig skulu þeir fylgjast með að afli sé veginn af löggiltum vigtarmönnum eins og lög og reglur mæla fyrir um.

9. gr.

Eftirlitsmenn skulu að loknu hverju verkefni gefa viðkomandi yfirmanni skýrslu um eftirlitsferðina. Í skýrslum skal, m. a. getið um áminningar og kærur vegna brota og hvaða gagna hefur verið aflað í ferðinni.

Ennfremur skulu eftirlitsmenn halda dagbók, sem ráðuneytið leggur til. Í dagbók skal tekið fram á hvaða skipi þeir voru og hvenær. Sömuleiðis í hvaða verstöðvum verið var við eftirlit, gististaðir, farartæki og annað er yfirmenn eftirlitsins óska eftir og að gagni má koma við daglegan rekstur eftirlitsins.

Dagbók skal skila eftir hvern mánuð.

10. gr.

Eftirlitsmenn skulu leita álits og úrskurðar deildarstjóra um atriði, sem þeir eru í vafa um.

11. gr.

Verði eftirlitsmaður þess var, að einhver brýtur móti ákvæðum laga um veiðar í fiskveiðilandhelgi Íslands og skyldra laga og reglugerða, sem settar eru samkvæmt þeim, skal hann tilkynna deildarstjóra um það, hafi hann ekki önnur fyrirmæli.

12. gr.

Eftirlitsmönnum er óheimilt að stunda nokkurn atvinnurekstur, sem lýtur að fiskveiðum, fiskverkun eða fiskverslun.

13. gr.

Eftirlitsmönnum er bannað, að viðlagðri ábyrgð eftir ákvæðum almennra hegningarlaga um brot í opinberu starfi, að skýra óviðkomandi mönnum frá nokkru því, sem leynt á að fara og þeir hafa fengið vitneskju um í starfi sínu.

14. gr.

Eftirlitsmenn verða að sætta sig við þær breytingar, sem gerðar kunna að verða á erindisbréfi þessu.

15. gr.

Erindisbréf þetta er gefið út samkvæmt 8. gr. laga nr. 81 31. maí 1976 um veiðar í fiskveiðilandhelgi Íslands til að öðlast þegar gildi.

Sjávarútvegsráðuneytið, 24. janúar 1983.

F. h. r.

Jón L. Arnalds.

Þórður Eypórsson.